

高

十

六

三

二

一

十

六

三

二

高
令
公
集

高
允
著

中
華
書
局

叢書集成初編

陸士衡集（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

高令公集

此據畿輔叢書本
排印初編各叢書
僅有此本

高令公集

魏 渤海高 允著

進天文要略表

往年被敕令臣集天文災異使事類相從約而可觀臣聞箕子陳謨而洪範作宣尼述史而春秋著皆所以章名列辟景測皇天者也故先其善惡而驗以災異隨其失得而效以禍福天人誠遠而報速如響甚可懼也自古帝王莫不尊崇其道而稽其法數以自修飾厥後史官並載其事以爲鑒誠漢成時光祿大夫劉向見漢祚將危權歸外戚屢陳妖眚而不見納遂因洪範春秋災異報應者而爲其傳說以感悟人主而終不聽察卒以危亡豈不哀哉伏惟陛下神武則天叡鑒自遠欽若稽古率由舊章前言往行靡不究鑒前皇所不逮也臣學不洽聞識見寡薄懼無以裨廣聖聽仰酬明旨今謹依洪範傳天文志微其事要略其文辭凡爲八篇

郡國建學表

臣聞經綸大業必以教養爲先成秩九疇亦由文德成務故辟雍光於周詩泮宮顯於魯頌自永嘉以來舊章殄滅鄉閭蕪沒雅頌之聲京邑杜絕釋奠之禮道業陵夷百五十載仰惟先朝每欲憲章昔典經闡素風方事尙殷弗遑克復陛下欽明文思纂成洪烈萬國咸甯百揆時敘申祖宗之遺志興周禮之絕業

爰發德音。惟新文教。摺紳黎獻。莫不幸甚。臣承旨敕。並集二省。披覽史籍。備究典紀。靡不敦儒以勸其業。貴學以篤其道。伏思明詔。元同古義。宜如聖旨。崇建學校。以厲風俗。使先王之道。光演於明時。郁郁之音。流聞於四海。請制大郡立博士二人。助教四人。學生一百人。次郡立博士二人。助教二人。學生八十人。中郡立博士一人。助教二人。學生六十人。下郡立博士一人。助教一人。學生四十人。其博士取博關經典。世履忠清。堪爲人師者。年限四十以上。助教亦與博士同年限三十以上。若道業夙成。才任教授。不拘年齒。學生取郡中清望。人行修謹。堪循名教者。先盡高門。次及中第。

矯頽俗疏

前朝之世。屢發明詔。禁諸婚娶。不得作樂。及葬送之日。歌謠鼓舞。殺牲燒葬。一切禁斷。雖條旨久頒。而俗不革變。將由居上者未能悛改。爲下者習以成俗。教化陵遲。一至於斯。昔周文以百里之地。修德布政。先於寡妻。及於兄弟。以至家邦。三分天下而有其二。明爲政者。先自近始。詩云。爾之教矣。民胥效矣。人君舉動。不可不慎。禮云。嫁女之家。三日不息燭。娶婦之家。三日不舉樂。今諸王納室。皆樂部給伎。以爲嬉戲。而獨禁細民不得作樂。此一異也。古之婚者。皆揀擇德義之門。妙選貞閑之女。先之以媒娉。繼之以禮物。集寮友以重其別。親御輪以崇其敬。婚姻之際。如此之難。今諸王十五便賜妻別居。然所配者。或長少差舛。或罪入掖庭。而作合宗王。妃嬪藩懿。失禮之甚。無復此過。往年及今。頻有檢劾。誠是諸王過酒致責。跡其元起。亦由色衰相棄。致此紛紜。今皇子娶妻。多出宮掖。令天下小民。必依禮限。此二異也。萬物之生。靡不

有死。古先哲王，作爲禮制，所以養生送死，折諸人情。若毀生以奉死，則聖人所禁也。然葬者藏也，死者不可再見，故深藏之。昔堯葬穀林，農不易畝；舜葬蒼梧，市不改肆。秦始皇作爲地市，下錮三泉，金玉寶貨，不可計數，死不旋踵，尸焚墓掘，由此推之，堯舜之儉，始皇之奢，是非可見。今國家營葬，費捐巨億，一旦焚之，以爲灰燼，苟靡費有益於亡者，古之人奚獨不然？今上爲之不輟，而禁下民之必止，此三異也。古者祭必立尸，序其昭穆，使亡者有憑，致食饗之禮，今已葬之，魂人直求貌類者，事之如父母，燕好如夫妻，損敗風化，瀆亂情禮，莫此之甚。上未禁之下，不改絕，此四異也。夫饗者所以定禮儀，訓萬國，故聖王重之，至乃爵盈而不飲，肴乾而不食，樂非雅聲則不奏，物非正色則不列。今之大會，內外相混，酒醉喧譁，罔有儀式，又俳優鄙藝，污辱視聽，朝廷積習以爲美，而責風俗之清純，此五異也。今陛下當百王之末，踵晉亂之弊，而不矯然釐改，以厲頽俗，臣恐天下蒼生，永不聞見禮教矣。

諫起宮室疏

臣聞太祖道武皇帝，旣定天下，始建都邑，其所營立，非因農隙，不有所興。今建國已久，宮室已備，永安前殿，足以朝會萬國，西堂溫室，足以安御聖躬，紫樓臨望，可以觀望遠近。若廣修壯麗，爲異觀者，宜漸致之，不可倉卒計斫材運土，及諸雜役，須二萬人丁夫充作，老小供餉，合四萬人，半年可訖。古人有言：一夫不耕，或受其飢；一婦不織，或受其寒。況數萬之衆，其所損廢，亦已多矣。推之於古，驗之於今，必然之效也。誠聖主所宜思量。

諫東宮上書

天地無私，故能覆載。王者無私，故能包養。昔之明王，以至公宰物，故藏金於山，藏珠於淵，示天下以無私。訓天下以至儉，故美聲盈溢，千載不衰。今殿下國之儲貳，四海屬心，言行舉動，萬方所則。而營立私田，畜養雞犬，乃至販酤市鄽，與民爭利，議聲流布，不可追掩。夫天下者，殿下之天下，富有四海，何求而不獲，何欲而弗從，而與販夫販婦競此尺寸，昔號之將亡，神乃下降，賜之土田，卒喪其國。漢之靈帝，不修人君之重，好與宮人列肆販賣，私立府藏，以營小利，卒有顛覆傾亂之禍。前鑒若此，甚可畏懼。夫爲人君者，必密於擇人，故稱知人則哲。惟帝難之，商書云：「無邇小人。」孔父有云：「小人近之，則不遜，遠之，則怨矣。」武王愛周，召齊畢，所以王天下。殷紂愛飛廉，惡來，所以喪其國。歷觀古今存亡之際，莫不由之。今東宮誠曰乏人，雋父不少，頃來侍御左右者，恐非在朝之選，故願殿下少察愚言，斥出佞邪，親近忠良，所在田園，分給貧下，畜產販賣，以時收散，如此，則休聲日至，謗議可除。

東宮對

臣東野凡生，本無宦意，屬休延之會，應旌弓之舉，釋褐鳳池，仍參麟閣，尸素官榮，妨賢已久。夫史籍者，帝王之寶錄，將來之炯戒，今之所以觀往，後之所以知今，是以言行舉動，莫不備載，故人君慎焉。然浩世受殊遇，榮曜當時，孤負聖恩，自貽灰滅，卽浩之跡，時有可論。浩以蓬蒿之才，荷棟梁之重，在朝無審諤之節，退私無委蛇之稱，私欲沒其公廉，愛憎蔽其直理，此浩之責也。至於書朝廷起居之跡，言國家得失之事，

此亦爲史之大體。未爲多遠。然臣與浩實同其事。死生榮辱。義無獨殊。誠荷殿下再造之慈。違心苟免。非臣之意。

答宗欽書

頃因行李。承足下高問。延伫之勞。爲日久矣。王途一啓。得敘其懷。欣於相遇。情無有已。足下兼愛爲心。每能存顧。養之以風味。惠之以德音。執旣反覆。銘於心抱。吾少乏尋常之操。長無老成之致。憑賴賢聖。以自克勉。而來喻褒飾。有過其分。旣承雅贈。卽應有答。但唱高則難和。理深則難酬。所以留連日月。以至於今。今往詩一篇。誠不足標明來旨。且表以心。幸恕其鄙滯。領其至意。

北伐頌

皇矣上天。降鑒惟德。眷命有魏。照臨萬國。禮化不融。王猷允塞。靜亂以威。穆民以則。北虜舊隸。稟政在蕃。往因時闕。逃命北轅。世襲凶軌。背忠食言。招亡聚盜。醜類實繁。敢率大羊。圖縱猖獗。乃詔訓師。興戈北伐。躍馬裹糧。星馳電發。撲討虔劉。肆陳斧鉞。斧鉞暫陳。誠翦厥旅。積骸填谷。流血成浦。元兇狐奔。假息窮巖。爪牙旣摧。腹心亦阻。周之忠厚。存及行葦。翼翼聖明。有兼斯美。澤被京觀。垂此仁旨。封尸塋壙。惠加生死。生死蒙惠。人欣覆育。埋貫幽明。澤漸殊域。物歸其誠。神獻其福。遐邇斯懷。無思不服。古稱善兵。歷時始捷。今也用師。辰不及浹。六軍充合。萬邦以協。義著春秋。功銘玉牒。載興頌聲。播之來葉。

徵士頌

有序

昔歲同徵，零落將盡。感逝懷人，作徵士頌。蓋止於應命者，其有命而不至，則闕焉。羣賢之行，舉其梗概矣。今著之於左。

中書侍郎固安侯范陽盧玄子真

郡功曹史博陵崔綽茂祖

河內太守下樂侯廣甯燕崇玄略

上黨太守高邑侯廣甯常陟公山

征南大將軍從事中郎渤海高毗子翼

征南大將軍從事中郎渤海李欽道賜

河西太守饒陽子博陵許堪祖根

中書郎新豐侯京兆杜銓士衡

征西大將軍從事中郎京兆韋閬友規

京兆太守趙郡李詵令孫

太常博士鉅鹿公趙郡李靈虎符

中書郎中郎邱子趙郡李遐仲熙

營州刺史建安公太原張偉仲業

輔國大將軍從事中郎范陽祖邁。
征東大將軍從事中郎范陽祖侃士倫。
東郡太守蒲陰子中山劉策。
濮陽太守真定子常山許琛。
行司隸校尉中都侯西河宋宣道茂。
中書郎燕郡劉遐彥鑒。
中書郎武恆子河間邢穎宗敬。
滄水太守浮陽侯渤海高濟叔民。
太平太守平原子鴈門李熙士元。
祕書監梁郡公廣平游雅伯虔。
廷尉正安平子博陵崔建興禮。
廣平太守列人侯西河宋悋。
州主簿長樂潘天符。
郡功曹長樂杜熙。
征東大將軍從事中郎中山張綱。

中書郎上谷張誕叔術

祕書郎鴈門王道雅

祕書郎鴈門閔弼

衛大將軍從事中郎中山郎苗

大司馬從事中郎上谷侯辯

陳留郡太守高邑子趙郡呂季才

夫百王之御世也莫不資仗羣才以隆治道故周文以多士克甯漢武以得賢爲盛此載籍之所記由來之常義魏自神殤以後宇內平定誅赫連積世之僭掃窮髮不羈之寇南摧江楚西盪涼域殊方之外慕義而至於是假兵息甲修立文學登延儔造酬諮政事夢想賢哲思遇其□訪諸有司以求名士咸稱范陽盧玄等四十二人皆冠冕之胄著問州邦有羽儀之用親發明詔以徵玄等乃曠官以待之懸爵以縻之其就命三十五人自餘依例州郡所遣者不可稱記爾乃髦士盈朝而濟濟之美興焉昔與之俱蒙斯舉或從容廊廟或游集私門上談公務下盡忻娛以爲千載一時始於此矣日月推移吉凶代謝同徵之人凋殲殆盡在者數子然復分張往昔之忻變爲悲感張仲業東臨營州遲其還返一敍於懷齊矜于垂歿之年寫情於桑榆之末其人不幸復至殞歿在朝者皆後進之士居里者非疇昔之人進涉無寄心之所出入無解顏之地顧省形骸所以永歎而不已夫頌者美盛德之形容亦可以長言寄意不爲文二十

年矣。然事切於心，豈可默乎？遂爲之頌詞曰：

紫氣干霄，羣雄亂夏。王聖徂征，戎車屢駕。掃盪遊氛，克翦妖霸。四海從風，八垓漸化。政教無外，旣甯且一。假武曩兵，惟文是恤。帝乃旁求，搜賢舉逸。巖隱投竿，異人並出。聲靈廬生，量遠思純。鑽道據德，遊藝依仁。旌弓旣招，釋褐投巾。攝齊升堂，嘉謨日陳。自東徂南，躍馬馳輪。僭憑影附，劉以和親。茂祖焚單，夙耀不遺。克己勉躬，聿隆家道。敦心六經，遊思文藻。終辭寵命，以之自保。燕常篤信，百姓靡遺。位不苟進，任理棲遲。居沖守約，好讓善推。思賢樂古，如渴如饑。子翼致遠，道賜悟深。相期以義，和若瑟琴。並參幕府，俱發德音。優游卒歲，聊以寄心。祖根運會，克光厥猷。仰緣朝恩，俯因德友。功雖後建，祿實先受。班同舊臣，位並羣后。士衡孤立，內省靡疚。言不崇華，交不遺舊。以產則貧，論道則富。所謂伊人，實邦之秀。卓矣友規，稟茲淑量。存彼大方，揜此細讓。神與理宜，形隨流浪。雖屈王侯，莫廢其尚。趙實名區，世多奇士。山嶽所鍾，挺生三李。矯矯清風，抑抑容止。初九而潛，望雲而起。詵尹西都，靈惟作傅。垂訓皇宮，載理雲霧。熙雖中天，迹階卽署。餘塵可挹，終亦顯著。仲業淵長，雅性清到。憲章古式，綱繆典誥。時值險艱，常一其操。納衆以仁，訓下以孝。化被龍川，民歸其教。邁則英賢，侃亦稱選。聞達邦家，名行素顯。志在兼濟，豈伊獨善。繩匠弗顧，功不獲展。劉許履忠，竭力致躬。出能駟說，入獻其功。輜軒一舉，撓燕下崇。名彰魏世，享業亦隆。道茂夙成，弱冠播名。與朋以信，行物以誠。怡怡昆弟，穆穆家庭。發響九皋，翰飛紫冥。頻在省闕，亦司於京。刑以之中，政以之平。猗歟彥鑒，思參文雅。率性任真，器成非假。靡矜於高，莫恥於下。乃謝朱門，歸迹林野。宗敬延譽，號爲四僞。

華藻雲飛。金聲夙振。中遇沈疴。賦詩以訊。忠顯於辭。理出於韻。高滄朗達。默識淵通。領新悟異。發自心胸。質侔和璧。文炳雕龍。耀姿天邑。衣錦舊邦。士元先覺。介焉不惑。振袂來庭。始賓王國。蹈方履正。好是繩墨。淑人君子。其儀不忒。孔稱游夏。漢美淵雲。越雲伯度。出類踰羣。司言祕閣。作牧河汾。移風易俗。理亂解紛。融彼滯義。渙此潛文。儒道以析。九流以分。崔宋二賢。誕性英偉。擢穎閭閻。聞名象魏。譽譽儀形。邈邈風氣。達而不矜。素而能賁。潘符標尚。杜熙好和。清不潔流。渾不同波。絕希龍津。止分常科。幽而逾顯。損而逾多。張綱柔謙。叔術正直。道雅洽聞。躬爲兼識。拔萃衡門。俱漸鴻翼。發憤忘餐。豈要斗食。率禮從仁。罔愆於式。失不繫心。得不形色。郎苗始舉。用均已試。智足周身。言足爲治。性協於時。情敏於事。與今而同。與古曷異。物以利移。人以酒昏。侯生潔己。唯義是敦。日縱醇醪。逾敬逾溫。其在私室。如涉公門。季才之性。柔而執競。屈彼南秦。申威致命。誘之以權。矯之以正。帝道光邊。士納慶羣。賢遭世顯。名有代志。竭其忠才。盡其慨體。襲朱裳。腰紉雙佩。榮曜當時。風高千載。君臣相遇。理實難階。昔因朝命。與之克諧。披衿散想。解帶舒懷。此听如昨。存亡奄乖。靜言思之。中心九摧。揮毫頌德。潛爾增哀。

善論

劉涖常謂私人曰。若車駕不還。五當立樂平王。及涖誅王以憂死。日者董道秀亦誅。允著善論。

昔明元末起白臺。其高二十餘丈。樂平王嘗夢登其上。四望無所見。王以問日者董道秀。筮之曰。大吉。王默而有喜色。後事發。王遂憂死。而道秀棄市。道秀若推六爻以對王曰。易稱亢龍有悔。窮高曰亢。高而無

民不爲善也。夫如是，則上甯於王，下保於己，福祿方至，豈有禍哉？今舍於本而從其末，咎疊之至，不亦宜乎？

酒訓

臣被敕論集往世酒之敗德，以爲酒訓。臣以朽邁，遭人倫所棄，而殊恩過隆，錄臣於將歿之年。勗臣於已墜之地，奉命驚惶，喜懼兼甚，不知何事，可以上答。伏惟陛下，以淑哲之姿，撫臨萬國，太皇太后，以聖德之廣，濟育羣生，普天之下，罔不稱賴。然日昃憂勤，虛求不已，思鑒往事，以爲警戒。此之至誠，悟通百靈，而況於百官士民，不勝踴躍，謹竭其所見，作酒訓一篇，但臣愚短，加以荒廢，辭義鄙拙，不足觀採，伏願聖慈，體臣慙慙之情，恕臣狂瞽之意。其詞曰：

自古聖王，其爲饗也，玄酒在堂，而醕酒在下，所以崇本重原，降於滋味。雖汎爵旅行，不及於亂，故能禮章而敬不虧，事畢而儀不忒，非由斯致，是失其道。將何以範時軌物，垂之於世？歷觀往代成敗之效，吉凶由人，不在數也。商辛耽酒，殷道以之亡；公旦陳誥，周道以之昌。子反昏酣而致斃，程生不飲而身光。或長世而爲戒，或百代而流芳。酒之爲狀，變惑情性，雖曰哲人，孰能自競？在官者殆於政也，爲下者慢於令也。聰達之士，荒於聽也；柔順之倫，興於諍也。久而不悛，致於病也。豈止於病，乃損其命？諺亦有云：其益如毫，其損如刀。言所益者，止於一味之益，不亦寡乎？言所損者，天年亂志，天亂之損，不亦夥乎？無以酒荒而陷其身，無以酒狂而喪其倫。迷邦失道，流浪漂津，不師不遵，反將何因？詩不言乎？如切如磋，如琢如磨，朋友之

義也。作官以箴之。申謨以禁之。君臣之道也。其言也善。則三覆而佩之。言之不善。則衰於而貸之。此實先王納規之意。往者有晉。士多失度。肆敢誕以爲不羈。縱長醕以爲高達。調酒之頌。以相眩曜。稱堯舜有千鍾百觚之飲。著非法之言。引大聖爲譬。以則天之明。豈其然乎。且子思有云。夫子之飲。不能一升。以此推之。千鍾百觚。皆爲妄也。今大魏應圖。重明御世。化之所暨。無思不服。仁風敦洽於四海。太皇太后以至德之隆。誨而不倦。憂勤備於皇情。詰訓行於無外。故能道協兩儀。功同覆載。仁恩下逮。罔有不遵。普天率土。靡不蒙賴。在朝之士。有志之人。宜克已從善。履正存貞。節酒以爲度。順德以爲經。悟昏飲之美疾。審敬慎之彌榮。遵孝道以致養。顯父母而揚名。蹈閔曾之前軌。遺仁風於後生。仰以答所授。俯以保其成。可不勉歟。可不勉歟。

祭岱宗文

維皇興二年。敢昭告於岱宗之靈。正趾坤元。作鎮東夏。齊二儀以永固。崇至德以配天。故能資元氣以造物。協陰陽而變化。若其崑嶺峭峙。川谷幽深。神怪譎詭。倏忽百靈。吐納風雲。育成萬品。攝生之所歸焉。禎祥之所萃焉。是以歷代帝王之崇封禪。銘功以告其成。七十二君。咸在茲焉。自非功侔造化。應同自然。孰能若此者哉。自我國家。肅恭禮祀。懷柔百神。邦域之內。罔不成秩。往以天路未夷。雖望祭有在。今大化既同。奄有淮岱。謹薦於嶽宗之靈。尚饗。

鹿苑賦

啓重基於朝土。系軒轅之洪裔。武承天以作主。熙大明以御世。灑靈液以滂沱。扇仁風以遐被。踵姬文而築苑。包山澤以開制。植羣物以充務。蠲四民之常稅。暨我皇之繼統。誕天縱之明叡。追鹿莖之在昔。與三轉之高義。振幽宗於已永。曠千載而可寄。於是命匠選工。刊茲西嶺。注誠端思。仰模神影。庶真容之髣髴。耀金暉之煥炳。卽靈崖以構宇。竦百尋而直正。絙飛梁於浮柱。列荷華於綺井。圖之以萬形。綴之以清永。若祇洹之澄對。執道場之塗迴。嗟神功之所建。超終古而秀出。實靈祇之協贊。故存貞而保吉。鑿仙窟以居禪。闢重階以通術。澄清氣於高軒。佇流芳於王室。茂花樹以芬敷。涌醴泉之洋溢。祈龍宮以降雨。倅音液於星畢。若乃研道之倫。行業貞簡。慕德懷風。杖策來踐。守應貞之重禁。味三藏之淵典。或步林以經行。或寂坐而端宴。會衆善以並臻。排五難而俱遣。道欲隱而彌彰。名欲晦而愈顯。伊皇興之所幸。每垂心於華囿。樂在茲之閒敞。作離宮以營築。固爽塏以崇居。枕平原之高陸。恬仁智之所懷。眷山水以肆目。玩藻林以遊思。絕鷹犬之馳逐。眷耆年以廣德。縱生生以延福。慧愛內隆。金聲外發。功濟普天。善不自伐。尙諮賢以問道。詢芻蕘以補闕。盡敬恭於靈寺。遵晦望而致謁。奉請戒以畢日。兼六時而宵月。何精誠之至到。良九劫之可越。資聖王之遠圖。豈循常以明教。希縉雲之上升。羨頂生之高蹈。思離塵以邁俗。涉元門之幽奧。禪儲宮以正位。受太上之尊號。既存無而御有。亦執靜以鎮躁。視天規於今日。尋先哲之遺誥。悟二乾之重蔭。審明離之並照。下甯濟於兆民。上克光於七廟。一萬國以從風。總羣生而爲導。正南面以無爲。永措心於沖妙。夫道化之難期。幸微躬之遭遇。逢扶桑之初開。遭長夜之始曙。顧衰年以懷傷。惟負忝以